



08689

郭侍郎奏疏卷十一
密陳粵海關情形疏

奏爲欽奉

諭旨謹就

徵管

愚見體察粵海關情形恭摺密陳仰祈

聖鑒事竊

臣

二月初十日承准軍機大臣字寄同治五

年正月二十一日奉

上諭前因左宗棠奏粵海關收稅請由督撫設法籌辦

當諭令戶部議奏茲據奏稱該關積弊已深歷任總督

監督縱不至盡屬肥己亦難保不受家人丁書之朦蔽

今左宗棠奏聞每歲不下二百萬兩與該關奏報銀數

大相懸殊請飭兩廣總督廣東巡撫查明辦理等語粵

省軍務日久未竣籌餉之難該督撫監督等亦所深悉

豈容任聽家人丁書羣相吞食視爲故常亟應嚴行查

辦著瑞麟郭嵩燾嚴密查明該關各口實在收稅數目

以及朦蔽情形妥議章程限三箇月內詳悉奏明再由

該部酌覈辦理該督撫受恩深重務當破除情面秉公

確查倘敢飾詞迴護有意彌縫別經發覺卽治該督撫

以查辦不實之咎原摺著鈔給閱看將此諭令知之欽

此仰見

皇上垂念軍餉艱難清查關課綜覈名實之至意伏查



廣東市舶使之設起自唐之中葉垂至於今蓋千有二
二百年自來利之所趨弊卽乘之以生粵東民商嗜利
之深胥吏舞弊之堅未嘗不因擅海舶之利釀成此等
風氣臣在粵兩年於海關收稅情形略能知其節要不
敢不爲

皇上縷悉陳之自宋初設立廣州市舶提舉司後復增
設於杭州泉州厯元明仍其制爲三市舶司中間增設
裁併沿革不一而廣州一司獨無變更明世番船通市
各以其地甯波通日本泉州通琉球廣州通占城暹羅
及西洋諸國所定課額均無多是以康熙二十四年開

奏疏卷十一

二

南洋禁諸番市易并集廣州一口設立監督主稅務徵
銀九萬一千七百十四兩五錢復經兩次題減額定四
萬兩二分而已其後歲有贏餘爰定三年比較之例嘉
慶四年始以贏餘八十五萬五千五百兩著爲定額百
餘年來聚天下貨物歸併一口仍以湖絲茶葉爲大宗
額徵總數不及九十萬自五口通商以後添設稅務司
洋稅絲毫無從隱匿每年征稅猶及二百萬近年內江
通商湖絲一項全赴上海茶葉一項分赴漢口九江粵
東利源全窒商旅蕭條日甚一日徵稅猶及百萬以今
準昔情事昭然此粵海關稅務大略情形也左宗棠原

奏請令督撫設法籌辦再四思維約有三難查戶部則例所載粵海關稅口徵收正稅者三十三口徵收規銀者二十四口設役巡查者十三口道光二十九年澳夷毀撤澳門稅館而事局一變同治元年汕頭通商而事局又一變例設稅口時有增減海關事例土貨由洋船運載者以洋稅論洋貨由民船運載者仍以洋稅論洋人輪船往來海面較民船爲速又無風波盜賊之虞是以洋船之利日厚民船之利亦遂日薄約而計之廣州汕頭并設大關歸稅務司經理江門石岐佛山思賢濠等處監督遣人自行經理其海西高廉雷瓊各口海東

奏疏卷十一

三

惠潮各口則皆書吏承攬向例派各屬丞倅稽查亦祇虛應故事而已監督專司稅務所轄千餘里之稅口委任數十書吏誠不能無弊督撫事任較監督更繁勢將仍假手書吏爲弊均也假手地方官是於書吏之外又多一層支銷爲弊滋甚古人所謂利不百者不變法徒更舊章終無良策其難一也粵東民氣浮動紳商把持遠甚他省粵海關抽分漏稅之法行之百餘年商民一律遵守誠由相沿日久更無異同趨避之見也因查粵海情形東北兩江之水直出虎門西江別出崖門而分流於虎跳門中間江別紛歧東出者曰蕉門曰橫門南

出者曰磨乃門皆支海能通大船而總匯於省河故能控扼全省形勢潮州別爲一水東通漳州北達汀州水源六千餘里洋人通商口岸專在此處瓊州海口亦准通商至今洋船無一至者其餘東西兩路各口水源遠或數十里近或數里貿易不能及遠亦無大宗貨物在此銷販是以歷來皆歸書吏承辦今將書吏悉數裁汰從新辦理則此數十口者僻處海瀕耳目既有難周委任人員多至數十尤不易得兼慮開廠經費稍繁則收數轉絀而一經變易章程把持阻撓必所不免若仍循用舊時書吏直亦無從施其整頓其難二也粵海關例解內務府廣儲司銀三十萬兩其餘每歲應繳棧價皮價及傳辦物件皆不入額支蓋亦

奏疏卷十一

四

內廷供應之外府也杭州南北兩新關歸織造兼管所任者織造也取之關課與取之司庫無異海關監督則專以課稅爲事左宗棠所稱杭關新改章程情形絕不相同杭州新復釐捐所收較關稅爲輕稽查亦易覈實南北兩關附近杭州省城撫臣可以經理以抽釐章程施之課稅已多滯礙以杭關章程概之粵海關尤屬參差又近年沿海各關添設稅務司或由監督經理或由巡道經理皆專主稅務與稅務司朝夕討論易得其力

督撫事任既繁其勢亦稍曠遠尤恐日久弊生關係轉鉅其難三也查現任粵海關監督臣師曾精練明決綜覈有餘稽查各日漏稅最爲得法上年海關正稅徵至一百一十餘萬報解

定陵工程及戶部指撥京餉廣儲司公費爲歷任所未有卽令督撫設法籌辦亦不能及師曾之精覈因查粵海關設立監督以後雍正二年改歸巡撫經理八年復改歸總督旋又改歸廣州協副將並設副監督乾隆七年改歸督糧道八年又設監督旋改歸將軍以後又歸督撫經理者五六年十五年以後始專設監督

兩朝

奏疏卷十一

五

聖人於此蓋亦反復比較而後著爲成例百餘年舊制未易輕議更張體察情形實亦無足勝此任者至於書吏之侵牟家丁之朦蔽各省關課同坐此弊從無實數底簿可以稽查見聞所及亦略知其大概情形而其收數之多寡舞弊之淺深質之監督亦多茫然實無由推測隱微過事按求以期一發其覆應請

天恩飭下監督臣師曾查明各口收數核實整頓必能

日有起色所有體察粵海關情形謹據啓所見縷悉上

陳伏乞

皇太后

皇上聖鑒訓示謹

奏

奏疏卷十一

六

籌議各海口添設行釐片

會總督銜

再查各省開辦釐金城村市鎮按戶抽收爲坐釐江河總匯設廠抽查爲行釐富商大賈轉運數千里資本既厚而又貨物屯聚一船易於核算故行釐收數常倍於坐釐粵東江路四達滇水東通江西武水北通湖南合爲北江設立韶關一廠又下設立蘆包一廠兼扼四會連陽諸江之衝統計北江釐金每月約三萬有奇西江兼受潯梧二水爲廣西江路總匯設立後瀝一廠每月釐金六七千東江爲古龍川水僅及惠州屬境設立白沙一廠每歲釐金約二千餘獨省河以南通諸海口迄

奏疏卷十一

七

今未能舉辦因查近年洋人沿海通商內地土貨一例販運卽各省商販貿易亦皆乘坐輪船以取迅速是以遠自牛莊烟臺以及江浙福建近至海西之高廉雷瓊海東之潮州百貨轉輸無一不由海運從前上海釐稅每年三百餘萬取給於一海口視正稅增加一倍福州一口釐稅每年約一百三四十萬廈門一口釐稅每年約四五十萬均與正稅相將其餘天津烟臺甯波通商各口一例開辦釐捐論者徒曰廣東海道紛歧此抽則彼越恐以釐捐之故致礙正稅_臣等查宋史食貨志諸番異物十分抽一或十分抽二是以元世名爲抽分之

法戶部所載稅則大率百分取一粵東釐捐又視稅則加輕凡奸商規避稅釐設法繞越所謂僥倖營求逐蠅頭之利者也富商大賈所必不屑計較資本愈厚則顧惜愈深此亦無待深論或又曰香港孤懸海外爲洋貨屯聚之所其勢足以伺閭居奇一經抽釐必不運省

臣等查五口通商以後商人視物價低昂以爲避就較之從前廣東一口貿易相去懸絕而其時猶可遠攬湖南江西之貨與上海一口爭勝自內江通商東南利源全窒所能攬者廣東及廣西桂梧一隅之利百貨來去必經省河無可飛越香港商民居奇能奪省商之利而不

奏疏卷十一

八

能漏百貨入口之稅得失利弊情事昭然特由一二書吏主持此說以相阻難致釐捐訖無起色臣等伏念廣東坐釐已定紳商包抽之局其力足以把持一切誠令各口行釐收有成數即可漸次裁汰坐釐使省城各項貿易少一重攤派亦稍除紳商專利之弊於事局實有神益與其更變舊章盡錙銖之利而仍不免於流弊何如查照各省海口捐釐章程務令粵東一例辦理較爲事順而功亦尙易集現在監督臣師曾畱心大局才氣亦甚優裕臣等以此議久格不行並未一與酌商粵東軍餉支絀萬狀東江查辦各屬匪鄉畱兵尙二萬人肇

慶土客一案撫綏安插需費鉅萬無可營措勢不能不
謀稍開利源一俟軍務完竣之日仍與各廠釐捐一例
停止並不著爲常例伏乞

皇上天恩飭下師曾會同察看各海口情形添設行釐
其應如何核辦之處容_臣等酌議章程再行奏明開辦
是否有當伏乞

聖鑒訓示施行謹

奏

奏疏卷十一

九

渡船運貨漏稅應如何稽查議罰請 飭部編入則例片

再戶部則例開載漏稅罰例粵海關一口科則尤繁無一定程式近年商貨屯聚香港添設餉渡四十餘隻輪流運省所載貨物動輒數百石編開字號至數十家而或有一家夾帶私貨該關書吏援一半充公之例即將全船貨物悉數罰收其半常至赴臣等衙門控告在海關執戶部則例爲詞更不憑單稽查漏稅之戶遂時有奸民希圖充公賞號裝點情節赴關報驗漏稅弊端爲甚驗之商情亦頗未能平允應請

奏疏卷十一

十一

飭部添議渡船裝運貨物中有一家漏稅應如何稽查議罰之處編入則例以資循守是否有當伏乞 聖鑒訓示施行謹

奏

以上一摺二片初奉

旨查辦粵海關稅務卽具此稿以示瑞相未數日而有受代之信瑞相私錄其稿與蔣君會奏僅具一正摺而撤去二片惜哉自記

賞給二品頂戴謝恩疏

奏爲恭謝

天恩仰祈

聖鑒事竊臣於三月十八日准吏部咨開同治五年正月二十三日內閣奉

上諭三品頂戴署廣東巡撫郭嵩燾著賞給二品頂戴等因欽此當卽恭設香案望闕叩頭謝

恩伏念

臣以菲材濫權疆節稍自刻期於方寸無能圖效於涓埃攝事三年涖邊嶠而多慙撫御倡捐前歲冒

奏疏卷十一

十一

宸嚴而曲賜矜全夙夜兢兢深虞隕越屬以閩疆殘寇蹂躪經年仰資勝算於

廟謨獲藏成功於鄰閩合三省諸軍之力資專征任將之謀臣無尺寸之功徒有邱山之咎論功行賞豈所敢

承渥蒙

恩賚之優頒謬荷頭銜之寵晉拊膺而滋愧悚流民未息乎鴻螫搔首而拜

恩榮鉅任豈勝乎鼇戴臣惟有勉循職守整頓撫綏無

敢玩忽以冀仰答

高厚生成於萬一所有微臣感激下忱謹繕摺叩謝

天恩伏乞

皇太后

皇上聖鑒謹

奏

奏疏卷十一

十三

奉 旨著來京另候簡用謝 恩疏

奏爲恭謝

天恩仰祈

聖鑒事竊臣於同治五年四月初一日准吏部咨開內閣鈔出同治五年二月二十六日奉

上諭郭嵩燾著來京另候簡用廣東巡撫著蔣益澧補授欽此跪誦之下感悚難名伏念臣以菲材濫權疆節兩年有餘軍政之積疲已深無能一加匡救民生之凋敝日甚乃復重以誅求知行政以正風俗爲先而轉移無術知察吏以肅紀綱爲重而竭蹶仍多期發憤以自

奏疏卷十一

十三

疆徒積憂而成疾念臣迂疏之已甚深慙罔濟時艱如臣奉職之無方自分早嬰重譴

聖恩高厚曲賜矜全

命之來京俾遂瞻

天之素願

賜之簡用藉據陳力之愚忱因材而篤者生物之

仁權衡悉如其量補過不遑者服官之義終始求慊其

心聞新授撫臣蔣益澧已由上海乘坐輪船來粵自可

及時到任臣謹將經手事宜妥爲料理以備移交現在

沿海盜賊急待搜捕肇慶客民方籌安插在新舊交卸

之日人情易涉依違值地方多故之時事局尤虞叢脞
臣惟有在任一日期盡一日之心不敢稍涉疏忽自取
咎戾所有微臣感悚下忱謹繕摺叩謝

天恩伏乞

皇太后

皇上聖鑒謹

奏

奏疏卷十一

古



皇太后

皇上

天恩

伏乞

聖鑒

奏

請假修墓片

再^臣由翰林出身未履外任同治元年蒙

恩特授蘇松糧道旋擢運司甫及年餘驟膺疆寄自維
迂拙救過不遑茲蒙

皇上恩准來京另候簡用既幸釋夫仔肩尤深愜夫隱

願^臣籍隸湖南爲由粵入京便道先壘松楸多年未經
展視擬卽籲懇

恩施賞假四月俾^臣得以道經本籍從容料理稍事修
治以盡人子私情一俟假滿卽當遵

旨入京泥首

奏疏卷十一

七

宮門求

賞差使所有請假修墓緣由謹先附片陳明伏乞

聖鑒訓示謹

奏

嘉應等州縣被匪滋擾請將錢糧蠲免以紓民力疏

會

督

奏爲查明嘉應等州縣被匪滋擾過甚民力拮据籲懇
天恩俯准將同治四年分錢糧蠲免以紓民力仰祈
聖鑒事竊照廣東省惠潮嘉各屬於同治三四兩年被
髮逆汪海洋等疊次竄擾連陷數邑經江閩粵三省官
軍合力剿辦直至四年歲底方得一律肅清先後

奏報在案_臣等復查連年髮逆竄擾粵東各屬地方嘉
應鎮平兩州縣於同治四年失陷數月蹂躪最深平遠
一縣先於三年九月旋失旋復而四年分逆匪往來踞

奏疏卷十一

六

擾該州村莊之日亦最久此三邑人民流離田土荒廢
委員經過該州縣村莊一片蒿萊常行至數里始遇有
一二人民鳩形菜色不忍目睹本年正月經飭前藩司
李福泰就被擾最甚之區籌辦米石量爲撫卹並札候
補知府羅瀚隆齎帶銀五千兩會同鎮平縣親往各村
莊按戶發給飭購籽種及時開耕一面招撫流亡漸回
復業惟同治四年分應徵地丁錢糧銀米小民極形困
苦無力輸納如照依向辦待至查清實欠數目再行奏

請

恩施無以慰災區黎庶迫切企望之忱合無仰懇

皇上恩施逾格量爲變通先請

明降諭旨將同治四年嘉應鎮平平遠三州縣未完錢糧銀米全數豁免以廣

皇仁其前時已輸在官之銀米仍飭司道轉飭查明著落經徵人員分別解繳報部不准該牧令侵蝕升合分釐此外四年分旋失旋復之和平長樂並被擾稍次之興甯連平長甯大埔豐順等州縣俟查明輕重情形再行

奏請分別辦理

臣

等謹合詞恭摺具

奏伏乞

皇太后

奏疏卷十一

七

皇上聖鑒訓示遵行謹

奏

懇 恩豁免陽春信宜兩縣舊欠地丁銀米片

會總督銜

再肇慶府屬上客一案發端於恩平開平蔓延於陽春新興高明陽江新甯高要而同治元二年受害之慘以陽春一縣爲最甚至三年秋開客民漸次退出縣境四年春安插那扶金雞赤水等處地方旋又竄踞那吉距陽春稍遠該縣土民始漸能復業開耕又高州府屬之信宜縣城自咸豐十一年二月內被逆匪陳金缸等攻陷境內悉爲賊藪直至同治二年九月克復縣城而是年秋耕已誤溯查此兩縣同治二年內被擾情形困苦爲最疊據各該府縣於三四年開徵以後轉據紳民呈

奏疏卷十一

七

請奏懇

恩免地丁銀米前來臣等督飭司道委員馳往確查均屬實在情形而民間承大亂之後按年勉輸現年地丁銀米已屬十分拮据萬不能帶完亂離年分之舊賦若非欽承

恩旨准與豁免則書差藉詞帶徵百姓實已隱受其累臣等體察情形不敢不以上

聞除飭司將該二縣地丁銀米已完之數歸入奏銷案

內

題報外合無仰懇

皇上天恩將同治元二兩年陽春信宜兩縣未完地丁
銀米一律豁免以甦民困至元二兩年被擾被水稍次
之處俟查明輕重情形各歸各年奏銷案內分別辦理
臣等謹合詞附片陳明伏乞

聖鑒訓示謹

奏

奏疏卷十一

九

辦理東江及翁源長甯各屬土匪完竣現在籌辦肇慶

各匪疏

會總督衙

奏爲辦理東江及翁源長甯各屬土匪一律完竣現在籌辦肇慶各匪情形恭摺馳奏仰祈

聖鑒事竊

臣

等分別各營辦理東北江土匪平毀賊巢

情形經於同治五年三月二十五日會同奏明在案節據四川補用同知知府銜會紀鳳稟稱三月初六日攻克六里鄉老巢復又攻毀其右圍舊樓其左新樓益懼立繳軍械自縛詣營二百餘人會紀鳳訊明戕官案內及此次出圍抗拒官兵涂阿煌等三十九名立與正法

奏疏卷十一

十一

夥黨四十四名押縣訊辦餘皆省釋移兵進攻白圍白圍在諸圍之下故名下白樓亦各遞呈自首會紀鳳訊明積匪涂展油等十餘名誅之其最上曰烏樓爲逆首涂爲益巢穴屹然不動會紀鳳自三月二十日進攻至四月初一日連用大礮轟擊東南西南兩面均各坍塌數尺初二日五鼓該逆開圍門潛遁會紀鳳預派副將黃文煥都司蕭德貴林得貴各率一營沿河密伏以防竄逸每夜多發哨探令舉火箭爲號該逆方趨河岸鼻渡爲黃文煥等截回參將凌興發急率左營扼其歸路該逆拚死左右衝突把總張國威黃連貴揮眾向前截

殺陣斬六十餘名生擒十九名投河淹斃者尤眾其餘老弱婦女跪伏請命並縱遣之訊據獲犯涂獻根等供涂爲益自知所犯情罪重大脅伏其眾力抗官兵已於陣前伏誅其間已革監生涂添球涂自嶸已革武生涂惠溥庇匪抗官稔惡已久臣等並飭訊明正法稍資鑒戒查翁源縣屬東北縣長百餘里山勢回互本易藏奸如周陂磔下新江等處強鄉大族吞併小村幾無虛日臣等前檄飭會紀鳳等次第搜捕該處聞六里鄉各匪捕斲淨盡已據細送著匪許煥遂江新懷等三十一名計此月內可以蕙事該縣六里鄉涂匪蘊孽最深會紀

奏疏卷十一

三

鳳此次辦理亦最透現署翁源縣王惠溥明幹有才略會同辦理五十餘日均合機宜仍責成搜捕餘匪以靖地方又據長甯縣宋錫庚稟稱三月初五日攻破小水賊樓乘勢進駐小鎮小鎮逆首潘重飛咸豐四年會充紅匪攻劫龍門從化等縣積年凶橫差役不敢捕拏宋錫庚用溫言誘致擒之並擒其黨潘亞先等九名毀其礮樓適會臣等以朱國雄病故檄飭守備葉維光等將所部撤遣改派記名總兵會敏行馳赴長甯會剿宋錫庚商派都司林正棟會同坪坪司巡檢李炳炎凹下汛把總葉英輝分赴石橋畫眉塘宋尙等處匪巢搜捕獲

犯潘善三等十五名以次平毀禾溪等處匪樓數十座前後辦理沙田遙田臘溪禾溪四約數十鄉長甯一縣兇頑劫殺之風亦或可稍息又據記名總兵肇慶協副將楊青山總兵銜補用副將沈玉遂道銜刑部員外郎劉錫鴻稟稱辦理戽斗岡新塘以後東江水路略靖而石龍下另有小河通高英增步等處地方名曰峽內爲盜匪所屯聚商議移軍寶潭木排頭勒令繳匪詎高英盜首李大鯪魚增步盜首劉沙礮子卽劉亞熾竟敢糾合良邊村各匪在寮步新墟建立同義堂旗號以圖拒捕劉錫鴻商令京山司巡檢王崧會集紳士馳諭各鄉

奏疏卷十一

三

先安反側之心三月十九日急行軍分三路趨寮步新墟四川建昌鎮中軍遊擊鄧全勝遊擊銜高州鎮標千總陳宇成出中路督標後營參將張寅出左路沈玉遂以水師全營鈔其右路楊青山居中策應該匪排列迎敵五品藍翎黃俊英六品軍功鄧發源向前衝之中傷陣亡十餘人張寅陳宇成以大隊從中左兩路橫擊該匪退竄高英二十日仍分三路進攻高英該匪以全力衝拒中軍傷勇數人各軍奮力鈔擊李大鯪魚率其黨先遁賊勢狂奔隨將高英寮步新墟等處賊巢一例平毀李大鯪魚由虎門逃赴香港東江沿岸匪巢百餘里

始稍爲之一清臣等因查東莞沿海一帶拉沙花枝角尾等圍爲盜賊糾聚行劫之地稍進口厚街逶北日到濬村透南與新安交界曰錦堂錦厦諸村皆著名匪鄉也上年冬月會派記名總兵王朝治署撫標右營遊擊尙昌懋圍捕花枝角尾二圍獲匪數十人分別懲辦此次春耕方始不敢懸軍窮搜而肇慶客匪屯踞那吉萌底大田一帶時有出竄之勢臣等久擬東江事竣移軍籌辦因飭楊青山率所部各軍馳赴肇慶察看辦理總兵衙署羅定協副將鄭紹忠勦辦大坪股匪以後飭畱五百人駐紮永安搜捕餘匪其全軍亦經調赴肇慶查

奏疏卷十一

三

恩平開平兩處客匪屯踞那吉者四五萬人鶴山客匪屯踞五坑者二三萬人皆老弱婦女爲多尙不難勦辦而以數十萬客民與土民相爲仇殺今存者僅及十分之一始終未一抗拒官兵勦之無名撫之又苦無術嘉應克復以後詢之鎮平一縣荒山墾土數十里無人煙經派候補府羅瀚隆前往查勘又派候補府張崇恪查勘藍山一帶地方以爲安插之地首先清理新甯客產其次及恩平開平責令按畝估價以爲安插之資仍須重兵臨治誅鋤強梗餘眾聽從解散安插其無所歸者其新甯曹冲客匪滋擾地方尤甚亦必得一加懲辦此

臣等籌辦客匪大致情形也土民與客民積仇已深互相截殺幾無虛日今春五坑客匪分踞布辰那吉客匪擾及新興之天堂腰古又擾及陽春之合水黃泥灣經土民掩擊退踞三垌分紮黃欖角山等處其龍徑村棧木坪各處土匪又與客匪合併深慮官兵一加勦辦土人乘之又復悉眾他竄不獨無從受撫並亦不能強使受勦體察情形終無全策能使兵力稍厚乘初竄之時聲明其鈔搶劫殺之罪痛加掩擊令其自行解散而後清釐客產資給而周卹之以稍平其怨氣而使之有以自謀其生是亦勉強排解之一法現飭各軍分三路進紮仍飭肇羅道王澍馳赴新興妥籌勦撫機宜以期迅速藏事所有各營前後陣亡藍翎把總楊德貴五品藍翎黃俊英應懇

天恩照例給與優卹其餘中礮受傷透骨之花翎都司周鳳舞都司劉得萬花翎守備尹長貴等及各營陣亡受傷弁勇二百餘名應由臣等查明分別賞卹彙案咨報在事出力員弁已經前案奏明俟奉到

諭旨卽行彙案奏懇

恩施謹將辦理土匪完竣籌辦肇慶土客一案情形恭摺由驛馳陳伏乞

皇太后

皇上聖鑒訓示謹

奏

奏疏卷十一

三五

連平州兩次守城堵禦大股逆匪援案請廣學額疏會銜
奏爲連平一州兩次守城堵禦大股逆匪援案請廣學
額以昭激勸恭摺仰祈

聖鑒事竊查咸豐四年以後廣東紅匪屢次擾亂四會
三水澄海等縣紳民捐資募勇保守城池經臣等援案
奏請永遠增廣文武學額先後奉

旨允准在案查惠州府屬之連平州地處廣東邊界幅
員寬廣百數十里咸豐四年紅匪四起河源長甯失守
翁源被圍各縣均與該州接壤該州四面防堵賴各鄉
團之力下坪坑尾兩次擊賊獲勝勝州境以安咸豐九年

奏疏卷十一

三月內石達開大股由福建汀州竄由嘉應興甯直撲
連平州城知州孫志鈞方赴州屬銀梅催收錢糧聞道
回州州城四面賊騎充斥凡八日始由增壩密溪小路
用夜半入城局紳陳廷薦顏銑等督率民兵堵禦甚嚴
石逆開挖地道轟陷城牆兩次均經堵護又於東門開
挖地道一處甫成而大雨如注賊遂由翁源竄逸凡圍
攻十有五日石逆甫退翟火姑大股又竄踞州屬忠信
墟擾及長吉州城及各鄉防堵逾月臣等檢查舊卷孫
志鈞稟報由銀梅回州蘇陂局紳卓崗與其子卓翼垣
督勇赴援與賊接仗父子同時陣亡次子卓星垣仍復

督勇馳援長吉局紳賴永康葉芹光鍾文燾等拒賊軟
坑孫志鈞始得由開道入城西路局紳梁德雲梁書培
梁啟英等擊賊陣亡並斃壯勇一百數十名幾於忠義
勃發同治四年九月初七日汪海洋大股由和平竄撲
州城又分股由上坪繞出城北其時賊眾尙八九萬人
環城四面築立礮臺猛攻三日署知州福多參將朱國
雄督同局紳顏培豫等守禦兩夜襲攻賊營斬殺數十
人該逆解城圍竄踞上坑經月之久堵剿仍無虛日統
計咸豐四年同治四年各大股逆匪所過城池無一完
者該州紳民男婦在城堅守兩次賴以保全軍興十餘

奏疏卷十一

三

年紳民協同守衛城池若此類者實不多見急應優加
勸勵使各州縣有所觀感激發合無仰懇

天恩俯准援照成案將連平州學額永遠增廣文武各
二名以示獎勵之處出自

逾格鴻施謹會同廣東學政

臣

劉熙載恭摺具

奏伏乞

皇太后

皇上聖鑒訓示此外尙有新會縣紳民守城請復還學

額一案上年奏奉

諭旨飭部議令行查詳細情形現在另摺復奏合併聲

明謹
奏

奏疏卷十一

美



酌保連平州守城出力官紳片

會總督銜

再查咸豐九年連平州守城案內前督臣黃宗漢出示

褒獎聲明學正何維林外委李殿超紳士陳廷薦顏銑

等合力支持而考其時分守各城一出之民力支放勇

糧一取之捐輸紳士出力尤多而具保守城文武紳士

無一列名者臣等常心憫之同治四年守城案內署州

事福多係屬新任其餘多係上屆守城紳士忠義之氣

不爲少衰臣等詳加考覈酌定數人先行奏懇

恩施以昭激勸署連平州知州候補知縣福多應請免

補本班以同知直隸州補用在籍江蘇升用知府免補

奏疏卷十一

五

同知顏培豫應請免補本班以知府仍畱江蘇補用並

賞戴花翎道銜候選郎中顏鍾驥應請

賞加三品銜候選中書江有燦應請

賞加五品銜丁憂在籍湖南補用知府顏培肅應請

賞加道銜浙江補用同知顏鍾儁應請

賞戴花翎衛千總銜江啟蓉應請

賞戴藍翎訓導陳廷薦應請以訓導卽選並

賞加中書銜其朱國雄一軍及在事文武官紳守城擊

賊著有勞績者仍候彙同全案分別具

奏所有連平州守城尤爲出力官紳先行酌保緣由謹

附片陳奏伏乞

聖鑒訓示謹

奏

奏疏卷十一

三十一

查明紳民剿匪守城情形疏

會總督
學政銜

奏爲查明紳民剿匪守城情形據實覆

奏仰祈

聖鑒事案准禮部咨議復兩廣總督毛鴻賓等奏廣州府屬之新會縣文風日盛並力保危城請復還原設學額一摺於同治三年十二月初五日具奏奉

旨依議欽此粘單內開據原奏所稱咸豐四年賊匪圍攻新會縣城該紳民捐資募勇力保危城並未將實在情形詳細聲敘所請復還新會縣原設學額之處礙難率行議准應將守城時詳細情形確切查明據實具奏

奏疏卷十一

三

再行辦理等因當經轉飭查覆去後茲據廣東軍需總局司道詳稱據新會縣稟稱咸豐四年紅逆披猖所在蠢動卽經前縣飭紳設局團練七月初旬有佛山散匪吳麟祥等駕船數十由順德一路竄擾縣屬之江門埠句結土匪呂萃進陳松年等四出煽誘各鄉響應並有蘇黑虎李象能等匪樹旂倡亂附和而起新會營額兵千餘分防各屬參將衛佐邦先經奉調出師精銳悉往營伍空虛七月十五日該匪率眾擁至縣城圍攻東門分架雲梯局紳急同文武登陴堵禦鎗礮齊施首斃紅衣賊目並用火罐擲燒雲梯盡殲扒城悍賊至十八日

二更時候該匪乘雨潛進偷扒迤西之庇民門官紳分
投抵禦賊匪愈來愈多約至十數萬紳等按戶抽丁竭
力拒敵官倉民戶穀米俱空枵腹相持城崩復築自閏
七月二十至八月初九兩旬之內大小三十餘戰均有
斬擒八月十五日援師至我兵仍奮勇開城夾擊卽將
附城賊寨盡數掃蕩城圍立解此圍城兩月兵單糧絕
紳民力戰保守危城之實在情形也迨解圍後官兵奉
調回省賊眾又復肆起並旬結另股賊船三百餘號先
破邑東之外海村分路夾攻江門該紳等招募紅單師
船隨同前縣陳應聘駛往江門先後擊斃賊匪二百餘

奏疏卷十一

三

名燒燬匪屋數十間生擒蘇黑虎等一百餘名迨九月
十一二日佛山援賊大至以白石鄉爲巢更番誘戰各
紳協同吳守備分帶兵勇馳往進攻掩殺千餘始行退
去二十二日順德援賊又至仍潛師猛進大挫兇鋒而
退江門方定復有鶴山瓦窰股匪萬餘由陸路來犯各
紳督勇練三千名直擣瓦窰斃匪數百生擒四十餘名
會同營弁收復鶴山縣城此又防守江門進剿白石鄉
及擊退瓦窰竄匪並復鄰縣之實在情形也統計守城
及擊剿各匪所費糧餉俱由民間湊集並無動支官項
一切情形均經前縣詳報有案合無仰懇照依前次奏

案請奏加文學額二名武學額三名等情稟覆到局轉詳前來_臣等伏查該局現詳據新會縣查稟咸豐四年紳民固守危城及解圍後擊勦江門賊匪各情核與咸豐四年十月內前督_臣葉名琛撫_臣柏貴奏報新會縣被匪圍攻官軍紳勇勦散立解城圍進勦江門情形相符其進勦白石鄉擊斃瓦窑股匪協同收復鶴山縣城各情當時亦經稟報有案其事昭彰在人耳目不惟非賊匪經過地方所得藉口卽比較前次奏准加廣學額之四會三水等縣厥功尤偉茲由部_臣議奏查取勦匪守城詳細情形飭據查明詳覆相應據情覆

奏疏卷十一

三

奏仰懇

天恩俯准查照前奏於該縣捐輸增額之外復回新會縣文學額二名武學額三名以隆作育而昭激勸之處
出自

逾格鴻施除分咨戶禮兵三部查照外_臣等謹合詞恭摺覆

奏伏乞

皇太后

皇上聖鑒敕部核覆施行謹

奏

遵查駱氏祖墳一案片

會總督銜

再同治四年九月十六日准刑部咨同治四年六月初四日內閣奉

上諭駱秉章奏廣東省墳山禁步請飭遵照定例丈尺辦理以杜爭端一摺四川總督駱秉章本籍廣東花縣有前明所葬祖墳同治二年正月間該縣文生鄧輔廷於切近墳傍盜葬骨罈三穴經該族眾控縣清理該地方官並未丈量率行擬結復經駱秉章咨明廣東督撫覈實查辦旋據郭嵩燾咨稱該省通行章程無稅官山塋葬以穿心四丈爲限計由墳心量數至邊每面實止

奏疏卷十一

三

一丈鄧姓原開墳穴在該督祖塋一丈以外照依定章無可科罪駱秉章復咨查禮部刑部嗣據各該部咨稱定例庶人塋地九步穿心十八步凡發步皆從塋心數至邊鄧輔廷盜葬該督祖塋之處係在例文禁步之內應照例科罪是郭嵩燾所稱該省現行章程係與禮部定例不符廣東省多有無稅官山與別省情形不同墳塋禁步自應恪遵定例辦理若概用本省章程以前後左右各得一丈爲準恐倚勢侵佔者得所藉口盜葬之風益熾流弊伊於胡底著瑞麟郭嵩燾申明舊例通飭各屬嗣後審斷墳山案件無論官民均照例定禁步爲

限毋得率以本省定章定讞以致爭端難息流弊滋多並著該督撫將鄧輔廷盜葬之案迅卽按照定例丈尺核實定擬具奏不准稍涉迴護該部知道欽此恭錄行文知照等因並准四川督臣駱秉章咨送奏稿前來臣

等遵查例定品官墳塋禁步以次至庶民窆心應得十步詳釋例意蓋以羅圍礦誌拜臺庶民之力皆得自盡得窆心十八步之地聽從布置所以使人子孫爲保護墳塋之計非謂盡人可得十八步之地援引例文以交相爭佔也粵東山場多屬無糧無稅之官山聽人進葬其遠處他村覓地營葬者積習相沿必向本村立契

奏疏卷十一

三

繳納開穴工費不名山價其間侵買壓佔訟案繁多大率藉例定官民禁步恃勢強佔地方官至不能成讞乾隆年間詳定橫直二丈窆心四丈之章程准照戶部則例墾荒事宜條內有古冢周圍四丈以內不得開墾等語酌中定議凡營葬官山不論紳民統以橫直各得二丈爲限周圍實得八丈較之例定禁步所爭實遠而准以古冢周圍四丈之文已予寬畱餘地使足相安

國家定例所謂庶民者統言之耳其中貧富強弱相去天淵貧且弱者縱橫枕藉萬冢交錯從無爭論惟富強者營一棺之地卽謀佔踞禁步縱橫侵至數丈當時詳

定省例稍濟例文之窮而杜豪強侵佔之計以平百姓之爭蓋以省章爲斷丈尺多少出價承受紳民猶可通融辦理以例定禁步爲斷則直授豪強以兼併之資使啟爭端所以遵行數十年據以斷案猶能使百姓相安者此也各鄉官山可以進葬者多不過數十百丈鄉民叢葬於此若皆以禁步爲斷則一山葬至十餘棺而止後來者已將無地開穴近年捐例廣開一命之榮皆得捐請封典案照品級援例爭論禁步則富強有勢力者其侵佔倍甚於從前貧民復何所措其手足臣等於駱秉章咨查祖墳侵葬一案委員勘驗駱姓祖墳凡七

奏疏卷十一

三

冢相去皆不盈丈左右無碑之墳十餘冢其右譚姓朱姓祖墳相距略遠生員鄧輔廷葬地卽在駱譚各姓舊冢之交而距譚朱二姓墳尤近自駱姓控經花縣押遷事已了結又尙在省例丈尺之外礙難擬罪臣等因念駱秉章爲保護祖墳起見該處可以進葬之地已屬無多當飭臬司錄案立碑永遠禁止進葬而駱秉章仍援例定禁步上瀆

宸聰粵東紳富有氣力者頗多若皆據例定禁步爲詞祖墳附近進葬者皆可責以侵葬其已葬者亦可呈請押遷評訟將無已時此勢之萬不可行者也臣等因查

嘉慶初年會議及有力之家擇地營造生墳非貧民無力購地者比令其呈報地方官照例升科等語蓋亦爲營葬官山言之迄今亦無遵辦者擬請

飭部核准嗣後凡有力紳民欲按官階庶民例定塋地步數造墳者飭將土名四至弓步畝分及界內有無舊冢分晰具呈該地方官勘丈明確豎立石界照依山糧科則詳報升科給予司照隨時報部立案入額編徵卽准該紳民作爲私地管業並准其照依例定步數開拓墳塋界內餘地聽其畱空不准他人指作官山恃強侵葬界內舊冢仍飭存畱不准業戶藉口升科任意殘毀

奏疏卷十一

三

其未經呈報升科者仍照省例科斷無論紳民均以橫直二丈之內不准進葬爲率似此分別辦理則有力升科者得依例定禁步無力升科者仍可安葬官山各得情理之平而定例省章兩無違礙至粵東風氣有粗習地理專向各屬官山尋覓穴地以圖罔利謂之山棍凡侵佔盜葬之案皆由此種地師爲之厲階臣等已嚴飭花縣責成生員鄧輔廷交出營葬之地師從嚴懲究以清弊端是否有當謹附片陳請

聖鑒訓示謹

奏

請酌量變通督撫同城一條疏

奏爲

國家設官如督撫同城一條急宜酌量變通謹就

啓閱

歷所及推論其源流而究明其得失恭摺奏祈

聖鑒事竊查明永樂初潯桂柳三府蠻亂遣給事中雷
頃巡撫廣西爲巡撫之名所自始景泰三年潯梧黨亂
廷議以兩廣宜協濟應援乃設總督是總督巡撫二者
皆肇端於兩粵終明之世以十三布政使爲定員而總
督巡撫或分或併或設或罷大率與兵事相終始成化
以後建置日繁如京東北一路有薊遼總督宣大總督

奏疏卷十一

三

又有順天巡撫永平巡撫保定巡撫遼東巡撫宣府巡
撫大同巡撫天津巡撫密雲巡撫開府相望然考其時
督撫駐紮地方從無同城者保定添設總督而保定巡
撫別駐眞定宣大分設巡撫而宣大總督別駐陽和至
兩廣督撫沿革其初分設巡撫而後改設總督天順二
年遣右僉都御史葉盛巡撫兩廣則又稍易其名成化
元年又以總督兼巡撫嘉靖中添設廣東巡撫總督祇
兼巡撫廣西由梧州移駐肇慶隆慶三年又添設廣西
巡撫總督改兼巡撫廣東是兩廣總督巡撫明時亦未
嘗兼設

國朝以來總督巡撫著爲定制中間小有裁併而視明世紛更變易規模固遠勝矣其督撫同駐會城者三曰福建曰湖廣曰雲南本不同城而移駐會城遂成定例者一曰兩廣推原立法之始地方吏治歸各省巡撫經理聽節制於總督而總督專主兵是以河南山東山西專設巡撫卽不復設提督爲不欲使武臣主兵而巡撫又不得統轄提督故爲巡撫兼銜直隸四川甘肅專設總督仍兼巡撫銜大致以兵事歸總督以民事歸巡撫此

國家定制也而巡撫例歸總督節制督撫同城巡撫無

奏疏卷十一

完

敢自專者於是一切大政悉聽總督主持又各開幕府行文書不能如六部尙書侍郎同治一事也而參差枳枱之意常多道光之季兩廣蘊孽已深叛匪一起亂民從之如歸蔓延徧及東南而皖豫之捻匪陝甘之回匪乘之以逞爲亂者皆民也則各省撫臣之失職多矣額設營兵多或六七萬人少亦萬餘人竟不得一兵之用鎮將參遊循資超擢任爲將帥者更無一人所用以轉戰者皆勇也而兵爲虛設積久又益加累歲糜錢糧千餘萬相與處之怡然則各省督臣之失職尤甚矣而自軍興以來江忠源胡林翼羅澤南李續賓及今劉長佑

曾國荃劉坤一劉嶽昭等皆以司道主兵或積功至督撫兵權日分總督僅守虛名而例定分年查閱營伍考覈將弁均係總督專政出巡之日爲多兩省情形亦資周覽軍興數年此典竟廢同治元年兵部議奏御史陳廷經變通營制一摺奉

旨江蘇浙江安徽江西陝西湖南廣西貴州等省各鎮協武職陞遷調補暫由巡撫辦理千總以下徑田巡撫咨拔報部所有校閱營伍考核將弁并本省籌辦防剿卽專責成巡撫經理其總督兼轄省分軍政考核著徑由巡撫就近著考會同具題至巡撫同城者仍照舊章

奏疏卷十一

早

辦理等因欽此因查一省千餘里之地能考求其利病周知其情狀已難其人至於兼轄省分原不過奉行文書周旋應付稍求整頓隔閡必多所以議歸巡撫經理蓋亦窮而必變之勢也而與總督分省之巡撫軍政民事一聽主裁與總督同城之巡撫軍政既不得與聞民事又須受成總督一則虛列其銜一則兩操其柄是從前督撫同城名存而實去者僅一巡撫自頃數年則督撫之名實兩乖而巡撫乃尤爲失職臣請悉其得失利病爲我

皇上一陳之傳曰天下之動貞乎一者也惟其一也故

能齊百姓之耳目而定屬吏之從違宋置監州而兵以弱明置巡按而政以囂知道者惜之然於政之所出猶未有分也督撫同城愛憎好惡之異情寬嚴緩急之異用同爲君子而意見各持同爲小人而請張倍出如舉一人也此譽之彼毀之則是非淆劾一人也此遠之彼近之則趨避易徒令司道以下茫然莫知適從其君子逶迤進退以求兩無所忤其小人居間以遂其私國家定制錢糧及升調員缺總之藩司刑案總之臬司督撫專任其成本不易有所設施而又水火交攻戈矛互進是

奏疏卷十一

聖

皇上設官以求治也而督撫同城乃萬無可言治今使一縣而置兩令一郡而置兩守必不能以安矣此理勢之固然者也臣自道光二十七年通籍假歸過武昌目悉吏治之媮氣習之深心憂其將亂其後五年而亂作前後督撫殉難三人伏誅二人被劾四人賴胡林翼開立規模風氣爲之稍變雲南之亂則既成矣臣前督張亮基每言及前撫臣徐之銘牽掣情形輒至慨歎而各直省吏治人心之敝閩粵爲尤甚細究其由來數十年瞻顧因循釀亂保姦實以督撫同城之故以言其事既如彼以言其效又如此歷來同城督撫互懷猜忌相爲

敵讐獨於公事一切雍容坐視以求免於嫌怨承平日久循例守職亦庶幾可以寡過處多事之時承積疲之俗而多所牽掣苟安無事以謂之和衷朝廷獨焉賴之自古中材多而賢人少

皇上委任疆吏但使中材足以自守其閒一二賢者弛張以時自可相維於不敝督撫同城則賢者永不得有爲中材亦因以自廢此臣所謂急宜變通者也近年雲

南督撫皆浮寄境外一無憑藉臣愚以爲雲貴總督一

缺宜暫停罷責成巡撫剿賊以一事權其閩浙兩廣總督則或援照明制兼併一員福建情形臣不能知其詳

奏疏卷十一

聖

廣東督撫兩標及兩署書吏分別裁併營政吏治關稅鹽務四者未嘗不可整飭權分則情多乖責專則事易集不獨於地方補益甚鉅其裨於

國家之經費亦必多矣臣伏見明臣韓雍在兩廣總督

任內疏言兩廣地大事殷請裁總督東西各設巡撫當時立見施行韓雍請分其責於兩省今臣請重其任於

專城義取因時事亦同揆至於

國朝督撫之沿革如河東總督偏沅巡撫時有廢置卽

咸豐九年裁撤南河總督一缺斷自

宸衷期使大臣無曠官虛設之員天下亦同受其利益

用意至爲深遠臣撫粵兩年於地方利弊源流知之頗
悉懷此欲陳久矣以慮語言稍涉直切或疑其有他意
是以欲言復止今旦夕交卸以切身之閱歷求及時之
變通用敢推明得失利病之原上備
聖明採擇可否仰邀

皇上天恩飭軍機大臣吏部兵部會議并鈔發臣摺交
各督撫公同核議以求妥善之處伏乞

聖鑒施行謹
奏

奏疏卷十一

酌保各員片

再臣在粵兩年於吏治稍加推求各州縣漸能有所觀

感以知盡心民事其一二廉能樸幹之才爲臣所深知

者不敢聽其淹滯如試用道屠繼烈強明果決遇事能

任勞怨臣在粵所見現任湖南撫臣前藩司李瀚章辦

事最爲精透屠繼烈規模稍狹而才氣實無倫比足勝

司道之選署羅定州知州周士俊慈祥而有斷制沈毅

而兼勤敏署南海縣知縣鄭夢玉精詳質實一往無前

所至政聲卓越以上二員經臣於同治三年三月內會

同前督臣毛鴻賓保奏奉

奏疏卷十一

四

旨交軍機處存記候旨錄用等因欽此又長甯縣知縣
宋錫庚緝匪安良疏通民氣值東江軍務正緊之時勤
辦匪鄉不遺餘力尤具有膽識鹽提舉銜吳川縣知縣
姜光耀勵精圖治威惠兼施屢次出海搜捕洋盜不避
艱險以上二員均有勞績應另案核獎臣以察吏安民
爲職無能圖效涓埃而所屬各員才能傑出如屠繼烈
卓然爲循吏以實心勤求民隱不邀虛譽如周士俊鄭
夢玉宋錫庚姜光耀允爲粵東救時之良吏耿耿此心
所欲以挽回積習整齊風俗尤在獎進人才不敢以交
卸在卽有所隱祕可否仰邀

皇上天恩准將道員屠繼烈交軍機處記存簡放周士俊鄭夢玉宋錫庚姜光耀均准以同知直隸州儘先補用仍懇

敕下督撫臣分別查案保奏鄭夢玉宋錫庚並准先換頂戴出自

逾格鴻慈所有酌保各員情形謹附片陳奏伏乞

聖鑒訓示謹

奏

奏疏卷十一

呈

保舉糧臺文案委員請 飭部無庸另立專條片

再 查軍務初興

朝廷轉餉以濟軍食其時難於擇將而不難於籌餉用兵日久將才以求而日多餉源以用而日竭則又難於籌餉而不難於擇將粵東完善之區擅山海之利而臣滋事兩年深悉籌餉艱窘情形求一廉幹耐事之才倍難於求一精悍善戰之將又今西北之甘回接連新疆西南之滇回盤踞數府貴州一省盜賊充斥勢成坐困其大患均由於軍餉支絀

皇上憫念各該省之艱難指撥協濟而皆有自謀不暇

之勢部

臣

奏疏卷十一

吳

奏請嚴催終苦無以爲應故今日之患尤莫甚於憂貧因查軍務初起之時營求差遣羣以爲利至於日久餉細委員薪水多從核減又不能以時支放艱苦日甚往時以軍營爲利藪趨之若鶩近今則以軍營爲苦差稍能自立者避之惟恐不速如甘肅滇黔各軍營願往者直無幾人人情避就亦無足責

皇上懸爵賞以勸勵天下務在求才備用而已並非以示猜防伏見近年以來言事者以糧臺籌餉爲大禁薄其獎敘又推及在營文案委員限以奏請拘以年分使

不得與戰功齒以示慎重名器之義臣查軍興十餘年保舉人員已逾萬數其以各項差使敘保者不逮戰功二十之一又惟戰功可以優保各項差使循資敘獎本有區別

國家多事之秋當使文武材用尺寸皆有以自效不當一切概之於武功伏查咸豐四年十一月吏部議復光祿寺卿宋晉條奏案內聲明糧臺文案出力人員向照軍營出力辦理據奏此等事件迥非親冒矢石可比應請嗣後糧臺文案及一切局務出力人員郎中知府以下概不准越級保升及請免補免選本班字樣欽奉

奏疏卷十一

聖

硃筆將糧臺文案等字刪去并奉

硃批糧臺文案與一切局務不同仍准酌量保奏惟不可概保越級等因咸豐七年以後連次部議均未聲敘四年內所奉

硃諭於糧臺文案人員痛加裁抑又於戰功內分別非克城擒酋不得越級請升非衝鋒冒鏑不得以道府請旨記名其實越級記名等項本以待功效卓著者在營當差各按勞績敘獎既經部定章程於是一切列入戰功之中科條愈繁援引比較動多參差易于部駁而營求請託之風愈甚人心亦愈趨澆漓臣因查嘉慶四年

額勒登保爲經略大臣其文案委員胡思顯至蒙
特旨褒獎

聖人權衡之大用出於常格而亦足見運籌決策之效
有時更優於戰功至於近年軍務籌餉倍難較道光以
前疆臣盡力部臣轉餉彼此分任情事迥殊故從前糧
臺職在支放而已近今所謂糧臺卽係籌餉委員錙銖
出入隨同督撫經營其勞倍甚軍營以餉糈爲至重部
議又以籌餉爲至輕未免有乖於名實臣愚以爲天下
之大本二曰用人曰理財二者之中又有其大本一曰
去欺而已矣與爲嚴其禁以防濫而使日長其欺何如
寬其途以求才而使各盡其用又凡清釐積弊察納人
言當使整齊嚴肅之氣多而迫促煩苛之意少明通簡
要之言用而搜求瑣屑之論除伏乞

奏疏卷十一

聖

皇上天恩飭部臣詳加核議凡軍營保舉人員仍依勞
績敘保無庸於糧臺文案委員另立專條特示裁抑期
以濟時艱而鼓舞辦事之心使不至別滋趨避其有冒
濫駁斥議處斷自

宸衷不獨以激勵人才實亦去欺之一端有關於勸懲
之大者愚昧之見不敢不以上陳伏祈

聖鑒謹

奏

奏疏卷十一

巽

酌保得力員紳片

再臣在粵添設水師六營經始東江飭總兵銜記名副將沈玉遂督辦兩年以來搜除盜艇肅清江路東江軍務深資其力此次辦理東莞歸善博羅等縣土匪該副將熟悉情形發蹤決策摧陷廓清出力尤多應請俟補缺後以總兵請

旨簡放並

賞加勇號以示優獎四川補用同知知府銜曾紀鳳因霆營叛勇擾及樂昌調赴北江防堵經年以一軍駐紮始興遏賊出路此次辦理翁源六里鄉一案攻破積年

奏疏卷十一

五

老巢五處匪首涂爲益等全數伏誅地方積患爲之一清該員積勞日久累案未經敘保應請免補本班以道員仍畱四川補用粵東保案積壓過多臣前彙次東西北三江十餘年舊案分三次會同具奏邀准

恩施在案兩年以來新案又已積至十餘起如西江前

後

奏准具保六案彙併一案辦理東江

奏保八案勢又不能逐案清釐又經飭藩司李福泰分營彙獎以期辦理稍歸簡易此外尚有北江

奏保一案各屬捕殺匪犯

奏保兩案督臣出奏均尙未知何日該二員深沈果毅謀勇兼資尤能通曉事理爲粵東用兵十餘年所未易得之將會紀鳳辦理翁源一案後應卽飭令裁撤臣於同治五年三月二十五日會奏籌辦各屬土匪案內邀請擇尤保奏尙未奉准

諭旨是以由臣先懇

恩施稍資鼓勵粵東營務陸路提臣高連升足勝方面之寄此外記名提督陽江鎮總兵任星元嚴明伉爽尤習水師記名總兵曾敏行王朝治樸實老練記名總兵肇慶協副將楊青山勤廉耐苦署撫標右營遊擊潮州

奏疏卷十一

五

鎮標左營遊擊尙昌懋精細曉暢及沈玉遂之沈毅有血性皆能不染粵東氣習有事足備干城無事亦資表率其餘將弁以下如鄧安邦戴朝佐言樹勳區泰初等可成就者尙多亦多有勞績應行核獎至省城督辦團務紳士前後舉發逆案三起獲盜二百餘名經臣於四月十二日會保道銜刑部員外郎劉錫鴻案內附片聲明所有內閣中書陳惟新應請

賞加員外郎銜同知銜江西安福縣知縣陳璞應請以同知直隸州仍畱江西儘先補用內閣中書銜陽江縣訓導梁棨訓應請以知縣遇缺在任卽選五品銜安徽

婺源縣知縣麥佩金畱辦團務並管帶壯勇巡防城內
外獲盜多名應請以同知直隸州仍畱安徽儘先補用
臣在粵兩年辦理盜匪深得該紳等之力不敢沒其微
勞可否邀

恩照准之處出自

逾格鴻慈謹附片陳奏伏乞

聖鑒訓示謹

奏

奏疏卷十一

五

請 飭蔣益澧整頓廣東地方風氣片

再查粵東吏治媮敝人人以勢利爭勝玩視法度積成風氣官評之賢否專視紳士之愛憎百姓疾苦無過問者即以釐捐論稍加清理謠言遠播而順德新會陽春陽江鶴山香山等縣私捐私抽多或數萬少或數千從無議論謂百姓專順人之私而以輸公爲大禁臣所不敢信去歲各屬局紳營私評控臣皆提省究追南海九江鄉絲釐亦係私抽該處距省甚近經臣委員查悉以推之順德局紳順德局紳又推之該處愚直如臣亦不敢深究地方風氣已成百姓惶惑愈甚官吏整飭愈難

奏疏卷十一

十一

伏見近年以來時事艱難各省疆吏多由

特簡感激奮發之意常多即

臣

愚劣尙不敢自頽廢大

臣秉公舉劾昭示功過原期爲

朝廷耳目若以一二人之私今日劾一督撫明日保一督撫直視地方大吏惟所愛憎廢置者不獨是非顛倒於

朝廷體制似亦微有關係蔣益澧才氣尙優或因是而專事周旋以求免於訾議地方公事粉飾必多應懇

皇上天恩責成整頓無懷顧忌

臣

疾病因循兩年以來

訖無補救深盼後任之稍補

臣

過愚昧之見不敢不以

上陳伏祈

聖鑒謹

奏

奏疏卷十一

五

郭侍郎奏疏卷十一終

03480

08689

